

Namminersorlutik Oqartussat terianniat illersugaanerat piniagaanerallu pillugit nalunaarutaat nr. 14, 18. oktober 2019-imeersoq

Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-imeersumi § 2, imm. 4, § 8, § 9, imm. 2, § 12, § 13, imm. 2 aamma 3, § 17, imm. 2, § 18 kiisalu § 21 kingullermik Inatsisartut inatsisaat nr. 1, 16. maj 2008-meersukkut allanngortinneqartoq aamma Pinngortitamik illersuineq pillugu Inatsisartut inatsisaanni nr. 29, 18. december 2003-meersumi § 5, § 35, § 36, imm. 2 kiisalu § 60, imm. 2 naapertorlugit aamma piniarneq pillugu siunnersuisoqatigiit tusarniaaffigereerlugit aalajangersarneqarput:

Atuuffii

§ 1. Nalunaarut manna Kalaallit Nunaanni issittumi terianniat (Vulpes Lagopus) illersugaanerannut piniagaanerannullu atuuppoq.

Nassuiaatit

§ 2. Issittumi terianniat nalunaarummi matumani teriannianik taagorneqarput.

Eqqissisimatitsineq aamma piniarneq

§ 3. Terianniat Kalaallit Nunaata Avannaani Kangianilu Nuna allanngutsaaliukkatut Immikkoortitami eqqissisimatitaapput.

Imm. 2. Terianniat Kalaallit Nunaata sinnerani piffissami 15. maajimiit 15. septembari ilanngullugu eqqissisimatitaapput, taamaattoq imm. 3 takuuk.

Imm. 3. Imm. 2-mi aalajangersagaq tungaviginagu terianniat nalunaarutip uuma atuutilerneraniit inoqarfiit, savaateqarfiit aamma qimmeqarfiit eqqaanni ukiuni tallimani inunnit atuuttumik inuussutissarsiutigalugu imaluunniit sunngiffimmi piniarsinnaanermut allagartalinnit ukioq kaajallallugu piniqqusaapput.

Piniariaatsit

§ 4. Teriannianik piniarnermi taamaallaat qoorortuut atoqqusaapput, sulloqqortussutsit akuerisat minnerpaaffiat .17-iuvoq.

Imm. 2. Qoorortuut eqiinnartakkat eqittaannartakkallu atornissaat inerteqqutaavoq.

Imm. 3. Qoorortoq sunaluunniit imm. 1 malillugu teriannianik piniarnermut atoqqusaasoq nakersarneqarsimassaaq paarilluagaallunilu.

Imm. 4. Toqunartut, nammineq seqqortussiat, kiisartut, nigarsiniutit, teriannianilluunniit uninngatitsiniutitut teknikkikkut atortut allat atoqqusaanngillat, taamaattoq § 12 takuuk.

Assartuutininik mootorilinnik atuineq

§ 5. Timmisartut, qulimiguullit assartuutillu mootorillit, soorlu qamuteralaat aamma ATV-t, teriannianik piniarnermi malersuinermilu atornissaat inerteqqutaavoq, taamaattoq § 12 takuuk.

Pisanik tunisineq aamma tunniussineq

§ 6. Terianniat inatsit malillugu pisarineqartut tuniniarneqarsinnaapput. Taamaattorli terianniat unioqquitsisumik pisarineqartut imaluunniit unioqquitsilluni pisarisat neqaat, amii, kigutaat taakkuluunniit ilaat tuninissaat tunniunnissaallu inerteqqutaavoq.

Terianniamik pissatamik toqutsineq

§ 7. Terianniamik aallaannittup terianniap eqqorneqarnermi kinguninnguagut toqusimanera qulakkiissavaa.

Imm. 2. Terianniaq pissanneqarsimappat piaarnerpaamik toqunneqassaaq.

Imm. 3. Terianniaq pissanneqartoq toqunneqanngippat, piniarnerup naammassineqarnerata kinguninnguutigut Aalisarnermut, Piniarnermut Nunalerinermullu Naalackersuisoqarfimmut imaluunniit piniarnermik nakkutilliisumut qaninnerpaamut nalunaarutigineqassaaq.

Imm. 4. Terianniamik pissanneqarsimasumik takunnittoqarpat, ajornanngippat toqunneqassaaq kingornalu Aalisarnermut, Piniarnermut Nunalerinermullu Naalackersuisoqarfimmut imaluunniit piniarnermik nakkutilliisumut qaninnerpaamut nalunaarutigineqassaaq.

Imm. 5. Terianniamik toqungasumik siumuisoqarpat nikisinnagu qimanneqassaaq kingornalu Aalisarnermut, Piniarnermut Nunalerinermullu Naalackersuisoqarfimmut imaluunniit piniarnermik nakkutilliisumut qaninnerpaamut nalunaarutigineqarluni.

Kommunimi ileqqoreqqusat

§ 8. Kommunimi ileqqoreqqusaliornikkut kommunalbestyrelsi killiliisinnaavoq aamma kommunip iluani nunaminertani aalajangersimasuni terianniarnermut malittarisassanik atuutilersitsisinnaavoq.

Imm. 2. Kommunimi ileqqoreqqusat Aalisarnermut, Piniarnermut Nunalerinermullu Naalackersuisumit aalajangersarneqassapput.

Pisanik nalunaaruteqartarneq

§ 9. Teriannianik pisat aamma pissatat tamarmik ukiut tamaasa PINIARNEQ-mi ukiumoortumik immersuiffissaq atorlugu imaluunniit www.sullissivik.gl-kkut nalunaarutigineqartassapput.

Imminut illersortariaqarnermi imaluunniit iliortariaqarnermi nalunaaruteqarneq

§ 10. Pinerluttulerinermi inatsimmi maleruagassat malillugit imminut illersortariaqarluni imaluunniit iliortariaqarluni terianniamik toqutsisoqarpat, terianniamik toqutsisup tamanna kommunimi Sullissivik aqputigalugu Aalisarnermut, Piniarnermut Nunalerinermullu Naalackersuisoqarfimmuut piaarnerpaamik nalunaarutigissavaa, taakkulu suliaq pillugu allassimasumik nassuiaasiussapput sumiiffik, ulloq aamma terianniap suaassusaa ilanngullugu.

Imm. 2. Aalisarnermut, Piniarnermut Nunalerinermullu Naalackersuisoqarfik terianniat, perlerortut ilanngullugit, inoqarfinnut qaninngoortut imaluunniit inoqarfinnut pisut pillugit maleruagassanik allassimasunik atuutilersitsissaaq.

Uumasuuteqarneq

§ 11. Terianniat, piaqqat ilanngullugit, Naalackersuisut akuersiseqqaarnagit uumasuutigineqaqqusaanngillat, taamaattoq § 12 takuuk.

Immikkut akuersissuteqarneq piniarnermullu piumasagaatit sukumiinerusut

§ 12. Aalisarnermut Piniarnermut Nunalerinermullu Naalackersuisoqarfik ilisimatusarnermut, terianniaqatigiit naleqqussarnissaannut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassat atuutsinneqannginnissaannik

immikkut akuersissuteqarsinnaavoq.

§ 13. Aalisarnermut Piniarnermut Nunalerinermullu Naalakkersuisoqarfik terianniarnermut atatillugu piumasaaqatinik aalajangersaasinnaavoq, tassunga ilanngullugu terianniat ilaannik ilisimatuussutsikkut nappaatinillu misissuinernut atugassanik tunniussisarnissamut.

Pineqaatissiissutit

§ 14. Nalunaarummi matumani § 3-mik § 4-mik, § 5-mik, § 6-mik, § 7, imm. 2-4-mik, § 10, imm. 1-mik kiisalu § 11-mik unioqutitsineq piniarneq aallaaniarnerlu pillugit inatsit malillugu akiliisitsinermik pineqaatissiissutigineqarsinnaavoq.

Imm. 2. Nalunaarummi matumani § 3, imm. 1-mik, unioqutitsineq pinngortitamik illersuineq pillugu inatsit malillugu akiliisitsinermik pineqaatissiissutigineqarsinnaavoq.

Imm. 3. Pinerluttulerinermi inatsimmi arsaarinnissut pillugu § 166 assingusumik atuuppoq.

Imm. 4. Terianniat taakkuluunniit ilaasa arsaarinnissutigineqartut qanoq atornissaat Aalisarnermut, Piniarnermut Nunalerinermullu Naalakkersuisoqarfimmit imaluunniit Naalakkersuisoqarfimmiit tamatumunnga piginnaatitaasumit aalajangiivigineqartassaaq.

Imm. 5. Nalunaarummi imaluunniit nalunaarut malillugu ileqqoreqqusani atuutilersinneqartuni akiliisitsinermik aalajangiinermut tunngaveqarpat, ingerlatseqatigiiffik inatsisitigut inuttut pisinnaatitaaffeqartoq pinerluttulerinermut inatsimmi maleruagassat malillugit akiliisinneqarsinnaavoq.

Imm. 6. Akiliisitsissutiniit, imm. 1 malillugu aalajangersarneqartuniit, isertitat Nunatta Karsianut nakkartinneqassapput.

Atuutilersitsineq

§ 15. Nalunaarut manna 18. oktober 2019-imi atuutilerpoq.

Imm. 2. Peqatigalugu Kalaallit Nunaanni teriannissat eqqissisimatitaanerit pillugu Namminersornerullutik Oqartussat nalunaarutaat nr. 20 ulloq 17. Maj 1989-imeersoq atorunnaarsinneqarpoq.

Imm. 3. Namminersornerullutik Oqartussat nalunaarutaat nr. 20 ulloq 17. Maj 1989-imeersoq malillugu ileqqoreqqusat atuutilersinneqartut atuutiinnassapput, allanik ileqqoreqqusaliornikkut atorunnaarsinneqarnissaasa tungaanut.

Namminersorlutik Oqartussat, ulloq 18. oktober 2019

Jens Immanuelson

/

Jørgen Isak Olsen